

四庫全書

史部

欽定四庫全書

史部

水經注釋卷十一至

詳校官監察御史臣周元良

刑部郎中臣許兆椿覆勘

總校官降調編修臣倉聖琳

校對官編修臣邱庭澂

謄錄監生臣倪桂馨

欽定四庫全書

水經注釋卷十一

仁和趙一清撰

易水

滏水

補

滹沱水

補

泆水

補

滋水

易水出涿郡故安縣閭鄉西山

易水出西山寬中谷東逕五大夫城南昔北平侯王

譚不同王莽之政子興生五子並避時亂隱居此山

故其舊居世以為五大夫城即此

一清按下
有脫字

岳讚云

五王在中龐葛連續者也易水東左與子莊溪水合

水北出子莊關南流逕五公城西屈逕其城南五公

即王興之五子也光武即帝位封為五侯元才北平

侯益才安喜侯顯才蒲陰侯仲才新市侯季才為唐

侯所謂中山之五王也俗又以五公名居矣庖林曰漢書無

北平侯惟元后弟諱字子元河平二年封平阿侯薨

子仁嗣初莽幼孤平阿侯諱多稱莽久之封莽新都

侯仁素剛直莽憚之為安漢公迫仁自殺諡刺侯子

述嗣按此則諱亦憐愛莽矣所不同于莽者平阿侯

仁也興豈仁之同生乎考兩漢書譚諸子董賢傳有

去疾哀帝時侍中育閎亦見張步傳莽東郡太守隗

器傳有向莽安定大尹馬嚴傳有仁子術即譚傳之
述也莽九江連率馬援傳有仁子磐馮爵土擁富貨
東觀記以為述子者凡此皆介恃同根盤跨維城彼
九族之降心若四體之無骨獨興父子自竄北鄙絕
意閏朝澗泉共清林風愈引若非鄺氏幾于無聞矣
檢太平御覽兩引河北記曰易縣有五公城王譚不
從王莽譚子興生五子避隱于此世祖並封為侯所
謂中山五侯也其西三十里有五大夫城水經注蓋
引其說若此言非爽王氏再世有二五侯矣全氏曰
善長可謂輕信者矣王譚封平阿不封北平其妄一
也譚以特進卒歷其弟商根枋政而莽始繼之譚之
墓木拱矣安得不同其政乎其妄二也莽之凶暴其
子稍不順即殺之豈容五才遠引其妄三也且其封
爵何以皆在北平等縣其妄四也班范荀爽並不一
及其妄五也方叔蓋疑之而未敢頌言日知錄曰兄
弟二名而用其一字者世謂之排行起自晉末漢人

所未有也水經注昔北平侯王譚不同王莽之政云
云是後人追撰妄說東漢人二名者亦少又按寰宇
記五公城事二館之城一清按此句澗曲泉清山高
出河北記也上有脫文

林茂風烟披薄觸目栖情方外之士尚憑依舊居取
暢林木其水東南入于易水易水又右會女思谷水
水出西南女思澗東北流注于易謂之三會口易水
又東屆關門城西南即燕之長城門也與樊石山水
合水源西出廣昌縣之樊石山東流逕覆釜山下東
流注于易水易水又東歷燕之長城又東逕漸離城

南蓋太子丹館高漸離處也易水又東逕武陽城南
蓋易自寬中歷武夫關東出是兼武水之稱故燕之

下都擅武陽之名左得濡水枝津故瀆武陽大城東

南小城即故安縣之故城也漢文帝封丞相申屠嘉

為侯國

一清按史表文帝後三年封

城東西二里南北一里半高

誘云易水逕故安城外東南流即斯水也誘是涿人
事經明證今水被城東南隅世又謂易水為故安河
武陽蓋燕昭王之所城也東西二十里南北十七里

故傳述遊賦曰出北薊歷良鄉登金臺觀武陽兩
城遼廓舊迹冥芒蓋謂是處也易水東流而出於范

陽

東過范陽縣南又東過容城縣南

易水逕范陽縣故城南秦末張耳陳餘為陳勝畧地

燕趙命蒯通說之范陽先下是也漢景帝中三年封

句奴降王代為侯國

一清按史表端侯代以景帝中
二年封漢表作靖侯范代范字

文王莽之順陰也易水又東與濡水合水出故安縣

西北窮獨山南谷東流與源泉水合水發北溪東南
流注濡水濡水又東南逕樊於期館西是其授首於
荆軻處也濡水又東南流逕荆軻館北昔燕丹納田
生之言尊軻上卿館之於此二城並廣一里許俱在
置阜之上上表而下方濡水又東逕范陽城西北舊
竭濡水枝流南入城逕相冢西冢互城側即水塘也
四周塋域深廣有若城焉其水側有數陵墳高壯望
若青邱詢之古老訪之史籍並無文證以私情求之

當是燕都之前故墳也。或言燕之墳塋斯不然矣。其水之故瀆南出屈而東轉，又分為二瀆：一水東注金臺陂，一水逕故安城西側城南注。易水夾塘崇峻，邃岸高深，左右百步有二釣臺，參差交峙，迢遞相望，更為佳觀矣。其一水東出金臺陂，東西七十步，南北五十步，側陂西北有釣臺，高十餘丈，方可四十餘步。陂北十餘步有金臺臺，上東西八十許步，南北加減高十餘丈，昔慕容垂全氏曰當作慕容德、鄴氏誤記之為范陽也。成

之即斯臺也北有小金臺臺北有蘭馬臺並悉高數丈秀峙相對翼臺左右水流經通長廡廣宇周旋被浦棟堵咸淪柱礎尚存是其基構可得而尋意欲圖還上京阻於行旅造次不獲遂心訪諸耆舊咸言昭王禮賓廣延方士至如郭隗樂毅之徒鄒衍劇辛之儔宦遊歷說之民自遠而屆者多矣不欲令諸侯之客伺隙燕邦故脩建下都館之南垂言燕昭創之於前子丹踵之於後故彫墻敗館尚傳鐫刻之石雖無

經紀可憑察其古跡似符宿傳矣

蔡氏夢弼草堂詩箋曰春秋後語燕

昭王曰安得賢士以報齊讐郭隗曰王能築臺于碣

石山前尊隗為師天下賢士必自至如其言作臺以

金玉崇之號黃金臺述異記臺在幽州燕王故城中

上谷圖經臺在易水東南十八里其說不同周氏密

齊東野語曰燕臺世多以為昭王而王隱以為燕丹

何也後見水經注云固安縣有黃金臺舊言昭王禮

賢廣延方士故脩建下都館之南陲燕昭創于前子

丹踵于後以此知王隱以為燕丹者蓋如此也朱氏

羹尊日下舊聞曰按隋上谷圖經郡道元注水經金

臺在易州明矣京師故迹傳自後人所築然自六朝

至今垂之載記形之歌詠當並存不廢也危林曰文

選注引上谷圖經曰黃金臺在易水東南十八里燕

昭王置千金于臺上以延天下之士又王隱晉書曰

段匹磾討石勒進屯故安縣故太子丹黃金臺據此

金臺蓋有兩也。郟氏以長廡被浦間館連都。昭創于前。丹踵于後。然則曲榭鋪金虎，臣畢擊高臺，蓄寶駿骨先來，豈亦昭貽孫謀。丹絕祖武者乎。一清按一統志，今都城及定興、安肅皆有黃金臺，惟在易州者為有據。餘皆後人所為也。濡水自堰又東，逕紫池堡，西屈而北流。

又有渾塘溝水注之。水出迺縣西白馬山南溪中，東南流入濡水。濡水又東至塞口古纍石堰水處也。濡水舊枝分南入城東大陂，陂方四里，今無水。陂內有泉淵而不流，際池北側俗謂聖女泉。濡水又東得白楊水口，水出迺縣西山白楊嶺下，東南流入濡水。時

人謂之虎眼泉也。濡水東谷檀山水水出。迺縣西北檀山西南流。與石泉水會。水出石泉固東南隅。水廣二十許步。深三丈。固在衆山之內。平川之中。四周絕澗阻水。八丈有餘。石高五丈。石上赤土。又高一匹。壁立直上。廣四十五步。水之不周者。路不容軌。僅通人馬。謂之石泉固。固上宿有白楊寺。是白楊山神也。寺側林木交蔭。叢柯隱景。沙門釋法澄。建刹于其上。更為思元之勝處也。其水南流。注于檀水。故俗有并溝。

之稱焉其水又東南流歷故安縣北而南注濡水又東南流於容城縣西北大利亭東南合易水而注巨馬水也故地理志曰故安縣閭鄉易水所出至范陽

入濡水閭駟亦言是矣又曰濡水合渠許慎曰濡水

入深深渠

一清按今本說文云濡水東入漆涑誤也巨馬水注云巨馬河即渠水可知善長所

見之書尚二號即巨馬之異名然二易俱出一鄉同未訛舛也

入濡水南濡北易至涿郡范陽縣會北濡又並亂流

入涑

一統志方順河自完縣發源曰祁水即古濡水也元和志濡水在北平縣西五里舊志源出伊

祁山俗名祁水古濡水有二方順河為南濡其北濡即北易下流為定興縣之沙河一清按觀此則知道元此注之繆南濡會蒲蘓諸水合于電河何曾至范陽與涑水合耶方順河即由逆水也後人醜其名故之是則易水與諸水互攝通稱巨馬水又東逕容城

縣故城北渾濤東注至勃海平舒縣與易水合關駟曰涿郡西界代之易水而是水出代郡廣昌縣東南郎山東北燕王仙臺東臺有三峰甚為崇峻騰雲冠峰高霞翼嶺岫壑冲深含烟罩霧者舊言燕昭王求仙處其東謂之石虎置范曄漢書云中山簡王之定

也厚其莽採涿郡山石以樹墳塋陵隧碑獸並出此
山謂之石虎山山有所遺二石虎後人因以名置置
之東麓即泉源所導也經所謂閭鄉西山其水東流
有涖水南會渾波同注俗謂之為電河司馬彪郡國
志曰電水出故安縣世祖令耿况全氏曰范史是况子奔擊故
安西山賊吳耐蠡符電上十餘營皆破之即是水者
也易水又東逕孔山北山下有鍾乳穴穴出佳乳採
者篝火尋沙入穴里許渡一水潛通流注其深可涉

於中衆穴竒分令出入者疑迷不知所趨每於疑路必有歷記返者乃尋孔以自達矣上又有大孔豁達洞開故以孔山為名也其水又東逕西故安城南即閭鄉城也歷送荆陘北耆舊云燕丹餞荆軻於此因而名焉世代已遠非所詳也遺名舊傳不容不詮庶廣後人傳聞之聽易水又東流屈逕長城西又東流南逕武隧縣南新城縣北史記曰趙將李牧伐燕取武隧方城是也俗又謂是水為武隧津津北對長城

門謂之汾門史記趙世家云孝成王十九年趙與燕

易土以龍兌汾門與燕燕以葛城武陽與趙即此也

一清按史記趙世家云孝成王十九年趙與燕易土以龍兌汾門臨樂與燕正義曰邢子勵趙記云龍山有四巖各有一穴大如車輪春風出東秋風出西夏風出南冬風出北按蓋謂龍兌也汾門括地志云易州永樂縣有徐水出廣昌嶺流至北平縣東南歷石門中俗謂之龍門蓋汾字誤也按括地志之言非也龍門見滏水博陵縣注亦曰汾水門又謂之梁門矣易水東分

為梁門陂易水又東梁門陂水注之水上承易水於

梁門東入長城東北入陂陂水北接范陽陂陂在范

陽城西十里方一十五里俗亦謂之為鹽臺陂陂水南通梁門淀方三里淀水東南流出長城注易謂之范水易水自下有范水通目又東逕范陽縣故城南即應劭所謂范水之陽也易水又逕樊輿縣故城北

漢武帝元朔五年封中山靖王子劉條

一清按漢表作脩脩有條

音為侯國王莽更名握符矣地理風俗記曰北新城

縣東二十里有樊輿亭故縣也易水東逕容城縣故城南漢高帝六年封趙將夜

一清按漢表作將夕此從史表於深澤

一清按索隱曰縣名屬中山此即地理志中山國深澤縣莽曰冀和者也而注文容城是涿郡之屬縣王莽更之曰深澤善長乃合二郡國之縣為一誤矣涿郡有南深澤不云是侯國寰宇記深澤縣下云南深澤城郡國縣道記云在東南二十五里以城名言之即是涿郡之屬縣以去國里數校近即此是中山之屬縣方輿紀要深澤縣下云南深澤城在縣東南五十七里十道志云漢置深澤縣屬中山國今縣治是也又于滹沱河南置南深澤縣屬涿郡此城是後漢廢深澤縣而南深澤如故二縣川土相隣趙侯之封邑當在此搃非新莽所改名容城之深澤也漢志中山國北新城桑欽言易出西北東入滹一統志北新城故城在安肅縣西南二十里漢置關駟曰河間有新城故加北後魏去北字北齊仍曰北新城尋省入清

景帝中三年以封匈奴降王唯徐盧一清按史表唯徐盧是胡

名漢表作搗侯徐盧搗又是謚搗雅聲相近百官公卿表太初三年容城侯唯塗光為太常唯塗即雅徐光乃盧於容城皆為侯國王莽更名深澤易水又東之孫

渥水注之其水上承二陂於容城縣東南謂之大渥

澗小渥澗其水南流注易水謂之渥澗口水側有渾

渥城易水逕其南東合澗水故桑欽曰易水出北新

城西北東入澗自下澗易互受通稱矣

全氏曰按桑欽之言與漢

志大相參錯澗入易易不入澗其入澗者支流耳善長蓋以互受通稱調傳之一清按漢志涿郡中水縣應劭曰在易澗二水之間故曰中水鄭說本此易水又東逕易京南漢末公

孫瓚害劉虞於薊下時童謠曰燕南垂趙北際惟有
此中可避世瓚以易地當之故自薊徙臨易水謂之
易京城在易城西四五里趙建武四年石虎自遼西
南達易京以京輒至固令二萬人廢壞之今者城壁
夷平其樓基尚存猶高一匹餘基上有井世名易京
樓即瓚所保也故瓚所與子書云袁氏之攻狀若鬼
神衝梯舞于樓上鼓角鳴于地中即此樓也易水又
東逕易縣故城南昔燕文公徙易即此城也關駟稱

太子丹遣荆軻刺秦王與賓客知謀者祖道于易水
上燕丹子稱荆軻入秦太子與知謀者皆素衣冠送
之於易水之上荆軻起為壽歌曰風蕭蕭兮易水寒
壯士一去兮不復還高漸離擊筑宋如意和之為壯
聲士髮皆衝冠為哀聲士皆流涕疑於此也余按遺
傳舊跡多在武陽似不饒此也漢景帝中三年封匈

奴降王僕黥

師古曰
黥音恒

為侯國也

又東過安次縣南

易水逕縣南鄆縣故城北東至文安縣與葦池合史記蘓秦曰燕長城以北易水以南正謂此水也是以班固闕駟之徒咸以斯水謂之南易

又東過泉州縣南東入于海

經書水之所歷沿次注海也

滏水出代郡靈邱縣高氏山

即滏夷之水也出縣西北高氏山山海經曰高氏之山滏水出焉東流注于河者也其水東南流山上有

石銘題言冀州北界故世謂之石銘陁也其水又南
逕候塘候塘川名也又東合溫泉水水出西北暄谷
其水溫熱若湯能愈百疾故世謂之溫泉焉東南流
逕興豆亭北亭在南原上欹傾而不正故世以欹城
目之東流注于滌水又東莎泉水注之水導源莎泉
南流水側有莎泉亭東南入于滌水又東逕靈邱縣
故城南水自中原南注滌水應劭曰趙武靈王葬其
東南二十里故縣氏之縣古屬代漢靈帝光和元年

中山相臧景上請別屬也地理志曰靈邛之號在武

靈王之前矣又按司馬遷史記趙敬侯九年敗齊于

靈邛

一清按顧氏炎武曰此別一靈邛水經注蓋誤以趙靈邛為齊靈邛不知齊境不得至代也方

輿紀要靈邛城在滕縣東三十里明水之南城周八里內有子城戰國時齊南境邑孟子謂蚺鼃曰子之辭靈邛而請士師史記齊威王元年三晉因齊喪來伐我靈邛是也則名不因武靈王

事如漢注滌水自縣南流入峽謂之隘門設隘於峽

以譏禁行旅歷南山高峰隱天深溪埒谷其水沿澗

西轉逕御射臺南臺在北阜上臺南有御射石碑清

按北史魏文成帝本紀靈邱有山高四百丈乃詔羣臣仰射山峰無能踰者帝彎弧發矢出三十餘丈過山南二百二十步遂列南則秀嶂分霄層崖刺天積石勒銘和平二年事也

石之峻壁立直上車駕沿湖每出所遊藝焉滌水西流又南轉東屈逕北海王詳之石碣南御所屈石柱北而南流者也

東南過廣昌縣南

滌水東逕嘉牙川

太平寰宇記蔚州飛狐縣下引水經注云廣昌縣南有交牙城未詳

所築以地名交牙川為名一清按飛狐漢廣昌縣隋仁壽元年改今名交牙川即嘉牙川交嘉聲之轉

川有二水南來注之水出恒山北麓滙川三合逕嘉
牙亭東而北流注于滙水水之北山行即廣昌縣界
滙水又東逕倒馬關關山險隘是為深峭勢均詩人

高岡之病良馬傳嶮之

一清按下有脫文
全氏曰是困字

行軒故關

受其名焉關水出西南長溪下東北歷關注滙滙水
南山上起御坐於松園建祇洹於東園東北二面岫
嶂高深霞峰隱日水望澄明淵無潛甲行旅所逕鮮
不徘徊忘返矣

又東南過中山上曲陽縣北恒水從西來注之

滏水自倒馬關南流與大嶺水合水出山西南大嶺

下東北流出峽峽石山側有祇洹精廬飛陸陵山丹

虹盤梁長津泛瀾縈帶其下東北流注于滏滏水又

屈而東合兩嶺溪水出恒山北阜

一清按漢志常山郡上曲陽縣

恒山北谷在西北有祠並州山東北流歷兩嶺間北嶺雖層陵雲舉

猶不若南巒峭秀自水南步遠峰石磴逶迤沿途九

曲歷睇諸山咸為劣矣抑亦羊腸邛來之類者也齊

宋通和路出其間其水東北流注于滏水又東左合
懸水水出山原岫盤谷輕湍濤下分石飛懸一匹有
餘直灌山際白波奮流自成潭渚其水東南流揚湍
注于滏滏水又東流歷鴻山世謂是處為鴻頭疑即

晉書地道記所謂鴻上關者也

初學記定州引水經注云定水東流歷山

俗謂之戲頭即晉書所謂鴻上關一清按是注無定水之目而戲頭之稱又與古志全乖存之以廣異說
關尉治北平而畫塞於望都東北去北平不遠兼縣
土所極也滏水於是左納鴻上水水出西北近溪東

南流注于滬水也

又東過唐縣南

滬水又東逕左人城南應劭曰中人城西北四十里亦或謂之為唐水也水出中山城之西如北城內有小山在城西側而銳上若委粟焉疑即地道記所云望都縣有委粟關也俗以山在邑中故亦謂之中山城以城中有山之目因復謂之為廣塘城也故中山記以為中人城又以為鼓聚殊為乖謬矣言城中有

山故曰中山也中山郡治京相璠曰今中山望都西
北二十里有故中人城望都城東有一城名堯姑城
本無中山之傳璠或以為中人所未詳也中山記所
言中人者城東去望都故城一十餘里二十里則滅
但苦其不東觀矣異說咸為爽矣今此城於盧奴城
北如西六十里城之西北泉源所導西逕郎山北郎
唐音讀近實兼唐水之稱西流歷左人亭注滌水又
東左會一水水出中山城北狼山阜下

一清按隋書
地理志唐有

郎山即此山蓋郎狼音同通用與古易水所出及徐水所注之郎山有別彼郎山在今易州西南四十里也隋書地理志永樂縣有郎山即此山亦謂之唐水也然於城非在西

又名之為電水又兼二名焉西南流入滏並所未詳

蓋傳疑耳滏水又東恒水從西來注之自下滏水兼

納恒川之通稱焉即禹貢所謂恒衛既從也

漢志常山郡上

曲陽縣恒山禹貢恒水所出東入滏滏水又東右苞馬溺水水出上曲

陽城東北馬溺水東北流逕伏亭晉書地道記曰望

都縣有馬溺關中山記曰八渡馬溺是山曲要害之

地一一關勢帶接疑斯城即是關尉宿治異日之來
非所詳矣馬溺水又東流注于澠澠水又東逕中人
亭南春秋左傳昭公十三年晉荀吳率師侵鮮虞及
中人大獲而歸者也澠水又東逕京邨北世謂之京
陵南對漢中山頃王陵澠水北對君子岸岸上有哀
王子憲王陵坎下有泉源積水亦曰泉上岸澠水又
東逕白土北南即靖王子康王陵三墳並列者是矣
澠水又東逕樂羊城北史記稱魏文侯使樂羊滅中

山蓋其故城中山所造也故城得其名滏水又東逕唐縣故城南北二城俱在滏水之陽故曰滏水逕其東城西又有一水導源盧奴縣之西北是城之西北平地泉湧而出俗亦謂之為唐水也東流至唐城北北隅竭而為湖俗謂之唐池蓮荷被水勝遊多萃其上信為嬉處也其水南入小溝下注滏水自上歷下通禪唐川之兼稱焉應劭地理風俗記曰唐縣西四十里得中人亭今於此城取中人鄉則四十也唐水

在西北入滄與應符合又言堯山者在南則無山以擬之為非也闕駟十三州志曰中山治盧奴唐縣故城在國北七十五里駟所說北則非也史記曰帝嚳氏沒帝堯氏作始封於唐望都縣在南今北城南對盧奴故城自外無城以應之考古知今事義全違俗名望都故城則八十許里距中山城則七十里驗途推邑宜為唐城城北去堯山五里與七十五里之說相符然則俗謂之都山即是堯山在唐東北望都界

一清按漢志注
此是張晏說

皇甫謐曰堯山一名豆山今山於城

北而如東嶄絕孤峙虎牙桀立山南有堯廟是即堯

所登之山者也地理志曰堯山在南

一清按漢志注
此是應劭說

今考此城之南又無山以應之是故先後論者咸以

地理志之說為失又即俗說以唐城為望都城者自

北無城以擬之假復有之途程紆遠山河之狀全乖

古證傳為踈罔是城西北豆山西足有一泉源東北

流逕豆山下合蘇水亂流轉注東入滙是豈唐水乎

所未詳也又於是城之南如東一十餘里有一城俗
謂之高昌縣城或望都之故城也故縣曰望都縣
在高昌南皇甫謐曰相去五十里稽諸城地猶十五
里蓋書誤耳此城之東有山孤峙世以山不連陵名
之曰孤山孤都聲相近疑即所謂都山也帝王世紀
曰堯母慶都所居張晏曰堯山在北堯母慶都山在
南登堯山見都山故望都縣以為名也唐亦中山城
也為武公之國周同姓

全氏曰按中山隗姓司馬彪曰子姓然則非周同姓也

周之衰也國有赤狄之難齊桓霸諸侯疆理邑土遣

管仲攘夷狄築城以固之

全氏曰按國語及管子齊桓築鄆五鹿中牟未聞築

中山也蓋邢衛諸國有赤狄之難道元誤以中山為

中牟故以山戎為赤狄皆誤也一清按寰宇記引輿地志云盧奴城北臨滹水南面派河杜預謂之管仲城蓋古記相傳如是也其後桓公不

恤國政周王問太史餘曰今之諸侯孰先亡乎對曰

天生民而令有別所以異禽獸也今中山淫昏康樂

逞欲無度其先亡矣後二年果滅魏文侯以封太子

擊也漢高祖立中山郡景帝三年為侯國一清按漢書景十三

王傳中山靖王勝以景帝前三年封然則是王國也王莽之常山也魏皇始二

年破中山立安州天興三年改曰定州治水南盧奴

縣之故城昔耿伯昭歸世祖于此處也涇水之右盧

水注之水上承城內盧水池地理志曰盧水出北平

疑為踈濶闕駟應劭之徒咸亦謂是矣

一清按漢志中山國北平

縣下云又有盧水亦至高陽入河此中山國之北平縣非右北平郡也應仲瑗乃加右字注于盧奴縣之下則繆矣道元並孟堅而非之何耶中山之北平縣在今保定府完縣右北平郡治則今薊州之境也

余按盧奴城內西北隅有水淵而不流南北一百步

東西百餘步水色正黑俗名曰黑水池或云黑水曰
盧不流曰奴故城地藉水以取名矣池水東北際水
有漢中山王故宮慶臺殿觀榭皆上國之制簡王尊

貴壯麗有加始築兩宮開四門穿城北累石竇通涿

一清按涿
字疑誤

唐水流于城中造魚池釣臺戲馬之觀歲

久頽廢遺基尚存今悉加土為利刹靈園池之四周
民居駢比填徧穢陋而泉源不絕暨趙石建武七年
遣北中郎將始築小城興起北榭立宮造殿後燕因

其故宮建都中山小城之南更築隔城興復宮觀今

府榭猶傳故制自漢及燕涿

一清按涿字疑誤

涿水逕石竇

石竇既毀池道亦絕水潛流出城潭積微漲涓水東

北注于涇涇水又東逕漢哀王陵北冢有二墳故世

謂之兩女陵非也哀王是靖王之孫康王之子也

清

按漢表靖王之子曰哀王哀王之子曰禰王師古曰禰音與康同禰惡謚也好樂怠荒而禰今注父子倒

易舛謬甚矣

涇水又東右會長星溝溝在上曲陽縣西北

長星渚渚水東流又合洛光水水出洛光溝東入長

星水亂流東逕恒山下廟北漢末喪亂山道不通此

舊有下階神殿中世以來歲書法族焉晉魏改有東

西二廟廟前有碑闕壇場相列焉

顧炎武北嶽辨云漢書云常山之祠

于上曲陽應幼風俗通云廟在中山上曲陽後漢書

章帝元和三年春二月戊辰幸中山遣使者祠北嶽

于上曲陽郡國志中山國上曲陽故屬常山恒山在

西北則其來舊矣水經注乃謂此為恒山下廟漢末

喪亂山道不通而祭之于此則不知班氏

已先言之乃孝宣之詔太常非漢末也

其水東逕

上曲陽縣故城北本岳牧朝宿之邑也古者天子巡

狩常以歲十一月至于北岳侯伯皆有湯沐邑以自

齊潔周昭王南征不還巡狩禮廢邑郭仍存秦罷井
田因以立縣縣在上曲之陽是曰曲陽有下故此為
上矣王莽之常山亭也又東南流胡泉水注之水首
受胡泉逕上曲陽縣南又東逕平樂亭北左會長星
川東南逕盧奴城南又東北川渠之左有張氏墓塚
有漢上谷太守議郎張平仲碑光和中立川渠又東
北合滏水水有窮通不常津注

又東過安熹縣南

縣故安險也其地臨嶮有井塗之難漢武帝元朔五年封中山靖王子劉應為侯國王莽更名寧嶮漢章帝改曰安熹中山記曰縣在唐水之西山高岸嶮故曰安嶮邑豐民安改曰安熹秦氏建元中唐水汎漲高岸崩頽城角之下有大積木交橫如梁柱焉後燕之初此木尚在未知所從余考記稽疑蓋城地當初山水洿盪漂淪巨棧阜積於斯沙息壤加以城地板築既興物固能久耳滌水又東逕鄉城北古舊盧奴

之鄉也中山記曰盧奴有三鄉斯其一焉後隸安憲
城郭南有漢朝時孝子王立碑

又東過安國縣北

滏水歷縣東分為二水一水枝分東南流逕解瀆亭
南漢順帝陽嘉元年封河間孝王子淑於解瀆亭為
侯國孫宏即靈帝也又東南逕任邳城南又東南逕

安郭亭南漢武帝元朔五年封中山靖王子劉傳富

為侯國沈氏曰史表作安郭侯傳此從漢表索隱曰表在涿郡而善長以為即中山之安國地理

志涿郡無安郭縣疑是鄉亭之名

其水又東南流入于呼池滏水又

東北流逕解瀆亭北而東北注之矣

又東過博陵縣南

一清按博陵為桓帝更名又在王忠文所指順帝之後

滏水東北逕蠡吾縣故城南地理風俗志曰縣故饒

陽之下鄉者也自河間分屬博陵漢安帝永初七年

封河間王開子翼為都鄉侯順帝永建五年更為侯

國也

沈氏曰永初當作元初翼由縣侯貶非封也

又逕博陵縣故城南即

古陸城漢武帝元朔二年封中山靖王子劉貞為侯

國者也

全氏曰漢表作陸城在涿郡當從史表作陸城漢書田叔傳亦作陸城一清按地理志涿

郡無陸城陸成中山國之屬縣也下云博陵史記蠡吾故縣蠡吾屬涿郡故表云涿也二縣川土相隣矣

地理風俗記曰博陵縣史記蠡吾故縣矣漢質帝本

初元年繼孝冲為帝

何氏曰是桓帝繼質帝酈氏誤記

追尊父翼陵

曰博陵因以為縣又置郡焉漢末罷還安平晉太始

年復為郡今謂是城為野城澠水又東北逕侯世縣

故城南

全氏曰按侯世不知何時之縣寰宇記定遠軍東光縣有侯井城引郡國縣道記云後漢

省舊地理書並失其所在以理推之蓋在今弓高縣西北三十五里房將池側置縣謂之侯井地理志河

間國之第二縣曰候井其即候世歟一清按非也侯世縣故城在龜縣東北候井廢縣在東光縣西兩地懸殊豈可混而為一字

又東北逕陵陽亭東又北左會博水

出望都縣東南流逕其縣故城南王莽更名曰順調

矣又東南潛入地下博水又東南循瀆重源湧發東

南逕三梁亭南疑即古勺梁也竹書紀年曰燕人伐

趙圍濁鹿趙武靈王及代人救濁鹿敗燕師于勺梁

者也今廣昌東嶺之東有山俗名之曰濁鹿羅城地

不遠土勢相隣以此推之或近是矣所未詳也博水

又東南逕穀梁亭南又東逕陽城縣散為澤渚渚水
潞漲方廣數里匪直蒲筍是豐實亦偏饒菱藕至若
嬰童卅女弱年憇子或單舟採菱或疊舸拆芰長歌
陽春愛深淥水掇拾者不言疲謠詠者自相和于時
行旅過矚亦有慰于羈望矣世謂之為陽城澱也陽
城縣故城近在西北故陂得其名焉郡國志曰蒲陰
縣有陽城者也今城在縣東南三十里其水又伏流
循瀆屆清梁亭西北重源又發博水又東逕白隄亭

南又東逕廣望縣故城北漢武帝元朔二年封中山

靖王子劉忠為侯國又東合堀溝溝上承清梁陂又

北逕清源城東

一清按清源方輿記要作清涼故城在今保定府東南五十里即將

梁也漢武帝元朔二年封中山靖王子劉朝平為侯

國其水東北入博水博水又東北左則濡水注之水

出蒲陰縣西昌安郭南中山記曰郭東有舜氏甘泉

有舜及二妃祠稽諸傳記無聞此處世代又遠異說

之來於是乎在矣其水自源東逕其縣故城南枉渚

迴湍率多曲復亦謂之為曲逆水也張晏曰濡水於城北曲而西流是受此名故縣亦因水名而氏曲逆矣春秋左傳哀公四年齊國夏伐晉取曲逆是也沈氏

曰左傳是取逆峙豈即曲逆耶杜預曰晉地

漢高帝擊韓王信自代過曲

逆上其城望室宇甚多曰壯哉吾行天下唯雒陽與是矣詔以封陳平為曲逆侯王莽更名順平濡水又東與蘇水合水出縣西南近山東北流逕堯姑亭南又東逕其縣入濡濡水又東得蒲水口水出西北蒲

陽山

漢志中山國曲逆縣蒲陽山蒲水所出

西南流積水成淵東西一

百步南北百餘步深而不測其水又東南流水側有

古神祠世謂之為百祠亦曰蒲上祠所未詳也又南

逕陽安亭東晉書地道記曰蒲陰縣有陽安關蓋陽

安關都尉治世俗名斯川為陽安壙蒲水又東南歷

壙逕陽安關下名關阜為唐頭坂出關北流又東流

逕夏屋故城實中嶮絕竹書紀年曰魏殷臣趙公孫

衰伐燕還取夏屋城曲逆者也其城東側因阿仍墉

築一城世謂之寡婦城賈復從光武追銅馬五幡於

北平所作也世俗音轉故有是名矣

庾林曰考地理志太原廣武縣

有賈屋山注云即史記趙簡子登夏屋者按此則夏

蓋讀作賈故夏屋轉為賈屋又變為賈復而賈復更

誦為寡婦也考古證今此城蓋只夏屋城耳鄙謂賈

復築之亦穿鑿之甚一清按周說固精審然汝水注

云桓水二源竒導于賈復城復南擊郟所築也俗語

訛謬謂之寡婦城以寡婦為賈復是一佳證且賈屋

山名賈復城名固未可合而為一也漢廣武縣在今

山西代州西十五里有廣武故城而賈復城在今直

隸保定府完縣西南至廣縣四十里方叔以

并州之山鎮當冀域之城地可謂不思之甚其水又

東南流逕蒲陰縣故城北地理志曰城在蒲水之陰

一清按漢志注
此是張晏語

漢章帝章和二年行巡北岳以曲逆

名不善因山水之名改曰蒲陰焉水右合魚水水出
北平縣西南魚山山石若巨魚水發其下故世俗以
物色名川又東流注于蒲水又東入濡故地理志曰
蒲水蘓水並從縣東入濡水又東北逕樂城南又東
入博水自下博水亦兼濡水通稱矣春秋昭公七年

齊與燕會于濡上杜預曰濡水出高陽縣

漢志涿郡高陽縣應

劭曰在清河之陽孔穎達春秋左傳正義曰今案高陽無此水也水源皆出于山其出平地者皆是山中

平地燕趙之界無泉出者未知杜言何所案據蓋孔氏不知此濡水之所出觀酈注自有泉源其後名曰和水又謂之南濡也然東北至河間鄭縣入易水是杜註以為出高易則非

濡水與虜池潏易互舉通稱矣地理志曰博水東至

高易入河博水又東北徐水注之水西出廣昌縣東

南大嶺下世謂之廣昌嶺嶺高四十餘里二十里中

委折五迴方能達里上頂故嶺有五迴之名寰宇記滿城縣

下引水經注云五迴山南七里有闕雞下望層山盛臺傳云燕太子丹闕雞于此今本無之

若蟻垤寶兼孤山之稱亦峻嶮也徐水三源竒發齊

瀉一澗東流北轉逕東山下水西有御射碑徐水又
北流西屈逕南巖下水陰又有一碑徐水又隨山南
轉逕東巖下水際又有一碑凡此三銘皆翼對層巒

巖郭深高壁立霞峙石文云皇帝以太延元年十二

月車駕東巡逕五迴之嶮邃覽崇岸之竦峙乃停駕

路側援引而射之飛矢踰于巖山

一清按此下有缺文寰宇記滿城縣

五迴山引此碑云飛矢踰于巖山三百餘步後鎮軍
將軍定州刺史樂良公乞文于射所立碑中山安喜

賈聰書足補
此注之逸

刊石用讚元功夾碑並有層臺二所即

御射處也碑陰皆列樹碑官名徐水東北屈逕郎山

又屈逕其山南衆岑競舉若豎鳥翅立石蘄巖亦如

劍杪極地險之崇峭漢武之世戾太子以巫蠱出奔

其子遠遁斯山故世有郎山之名山南有郎山君碑

事具于文

全氏曰此是謬說漢燕刺王之墓曰戾陵或是刺王之子耳

徐水又逕

郎山君中子觸鋒將軍廟南廟前有碑晉惠帝永康

元年八月十四日壬寅發詔錫君父子法祠其碑劉

曜光初七年

全氏曰中山之碑何以有劉曜紀年不可曉也

前頓邱太守郎

宣北平太守陽平邑振等共脩舊碑刻石樹頌焉徐
水又逕北平縣縣界有漢熹平四年幽冀二州以戊
子詔書遣冀州從事王球幽州從事張眼郡縣分境
立石標界具揭石文矣徐水又東南流歷石門中世
俗謂之龍門也其山上合下開開處高六丈飛水歷
其間南出乘崖傾瀾泄注七丈有餘濟盪之音竒為
壯猛觸石成井水深不測素波白激濤襄四陸瞰之
者驚神臨之者駭魄矣東南出山逕其城中有故碑

是太白君碑即山君之元子也其水又東流漢光武
追銅馬五幡于北平破之順水北乘勝追北為其所

敗短兵相接光武自投崖下遇突騎王豐於是投馬

進保范陽順水蓋徐水之別名也

後漢書光武帝紀
歸保范陽不得言

進方輿紀要作退保范
陽是矣此傳刻之誤

徐水又東逕蒲城北

一清按
蒲城今

直隸之蒲城縣也蒲蒲字本易淆保定府志及蒲城
縣志皆不能識其受氏之故或以為秦邑又以為張

蒼封北平侯子孫滿邑因名皆燕說也新唐書地理
志太平寰宇記並云唐天寶元年始立是邑不知元

魏時已有蒲城之號善長生于拓跋朝其言非謬元
和志云蒲城縣本漢北平縣地後魏于此置永樂縣

天寶元年改為蒲城以縣北故蒲城為名夫曰故蒲城則非自唐始矣蒲城之稱惟元和志及舊唐書同于鄭注其他紀載莫不從滿城之訛千年大惑誰復祛之章懷後漢書注云前書音義曰蒲陽山蒲水所出在今定州北平縣西又云北平縣屬中山國今易州永樂縣也又云東觀漢記作蒲本多作滿字者誤也北史魏陳留王虔傳兄顓從平中山以功賜爵蒲城侯觀此益信予言之有徵矣 又東逕清

苑城又東南與沈水合水出蒲城西俗謂之泉頭水

也地理志曰北平縣有沈水東入河即是水也全氏曰按

班志無沈水疑是脫文寰宇記沈水在清苑縣北東逕其城又東南左入徐

水地理志曰東至高陽入河今不能也一清按漢志中山國北平

縣徐氏東至高陽入博又望都縣博水東至高陽入河蓋徐水合博水以入河也下文引班志仍作入于

博徐水又東左合曹水水出西北朔寧縣曹河澤東

南流左合岐山之水水出岐山東逕邢安城北又東南入曹河曹水又東逕北新城縣故城南又逕北新城縣故城北王莽之朔平縣也曹水又東入于徐水徐水又東南逕一故城北俗謂之祭過城所未詳也

一清按冢宇記引輿地志云樊輿城西南隅有聖女祠女姓薛字義姜鉅鹿人嫁為樊輿王夫妻死于此城之隅就而祭之俗名祭隅城然則是城即樊輿縣之故城也道元以祭隅為祭過而云未詳得樂氏之

書其義始明也

徐水又東流入博水地理志曰徐水出北平東至高陽入于博又東入滏地理志曰博水自望都東至高陽入于滏是也

又東北入于易

滏水又東北逕依城北世謂之依城河地說無依城之名即古葛城也郡國志曰高陽有葛城燕以與趙者也滏水又東北逕阿陵縣故城東王莽之阿陸也建武二年更封左將軍任光為侯國滏水東北至長

城注于易水者也

補
滹沱水

禹貢錐指曰禹主名山川曲陽以下之滹本名恒靈壽以下之滹沱本名衛其出高是秦戲者則恒衛之別源自周禮以虜池嘔夷為并州之川其名著而恒衛之名遂隱矣又曰或問恒衛滹沱漢志明列為四水子謂恒即滹衛即滹沱亦有所據乎曰有之水經注云滹水東過上曲陽縣北恒水從西來注之自

下滏水兼納恒川之通稱即禹貢所謂恒衛既從也
此非恒即滏之明證邪水經無滹沱之目見濁漳易
滏巨馬諸篇中僅一二語故衛水無考然酈注凡二
水合流言自下互受通稱者不可枚舉則滹沱受衛
之後亦得通稱衛水可知也又曰滹沱大川也水經
當自為一篇頃閱寰宇記鎮州真定縣蒲澤下引水
經注云滹沱河水東逕常山城北又東南為蒲澤濟
水有梁馬俗謂之蒲澤口又滋水下引水經云滋水

又東至新市縣入滹沱河又深州饒陽縣枯白馬渠
下引水經云滹沱河又東有白馬渠出焉又瀛州河
間縣大浦淀下引水經注云大浦淀下導陂溝競奔
咸注滹沱是故人因決入之處謂之百道口此四條
檢今本無之則似水經元有滹沱水篇宋初尚存而
其後散逸滹沱原委不可得詳惜哉一清按滹沱水
篇失亡猶幸有宋初原本見於載籍得以尋其川脈
第東樵所引寰宇記之文尚有未盡謹補綴之如左

忻州秀容縣下引注水經云滹沱南歷忻中口俯會
忻川水水出西管涔山東也程侯山下引注水經云
忻川東歷程侯北山山甚層銳其下舊有採金處俗
謂之金山九域志忻州古跡引水經注云程侯北山
下有採金穴樂記處字疑穴字之誤又定襄縣三會
水下引水經云三會水出九原縣西東入滹沱水逕
定襄界又代州雁門縣句注下引水經云雁門郡北
對句注東陁其南九塞之一也晉咸寧元年句注碑

曰盖北方之險有盧龍飛狐句注為之首天下之阻所以分別外內也漢高祖欲伐匈奴不從婁敬之說械繫于廣武遂踰句注困于平城謂此處也漢志雁門郡下云句注在陰館北太原郡廣武縣下云河主賈屋山在北河主是句注之誤又龍泉下引注水經云龍泉出雁門縣平地其大三輪泉源沸湧騰波奮發以巨石投之輒噴出亦云潛通燕京山之天池也方輿紀要雁門下云龍躍泉水經注謂之雲龍泉相

傳與靜樂縣之天池潛通較樂記所引多一雲字又
五臺縣五臺山下引水經注云五臺山五巒巍然故
謂之五臺山晉永嘉三年雁門郡後人縣五百餘家
避亂入此山見山人為之先驅因而不返遂寧巖野
往還之士稀有望見其村居者至詣尋訪莫知所在
故俗人謂此山為仙者之都矣中臺之頂方三里近
西北陬有一泉水不流謂之太華泉蓋五臺之層秀
仙經云此山名紫府常有紫氣仙人居之內經以為

清涼山御覽引此注云其北臺之上冬夏常冰雪不
可居文殊師利常鎮毒龍之所今多佛寺四方僧徒
善信之士多禮焉又聖人阜下引水經注云滹沱水
東逕聖人阜阜下有泉泉側石上有二手跡其西復
有二腳跡甚大莫窮所自在縣西四十八里又云仙
人山在五臺縣東南五十里石巖上有人坐跡山腹
石上有手跡山下石上有雙腳迹皆西向立初學記
引注水經曰代州專池水西注五臺專池即虜池之

誤又思陽水東有獨山山上有崑崑上有坐跡山腹石上有兩手迹山下石上有兩腳跡俗名之曰仙人山也據此則樂記所稱仙人山亦是酈注原文而思陽水一語尤足補其闕逸魏書地形志肆州永安郡驢夷縣有思陽城蓋因水以得名故魏昌城下引水經云李克書曰魏文侯時克為中山相苦陁之吏上計而入多其前克曰苦陁上無山原林麓之饒下無谿谷牛馬之息而入多其前是苦吾百姓遂執而免

之漢光武時封大將軍杜茂為苦陘侯漢章帝北巡
改曰漢昌至魏文帝改漢昌為魏昌城又鎮州行唐
縣輪井水下引水經注云行唐城上西南隅有大井
若輪水深不測王山祠下引水經云行唐城內北門
東側祠後有神女廟廟前有碑其文云王山將軍故
燕薊之神童後為城神聖女者此土華族石神夫人
之元女趙武靈王初營斯邑城彌載不立聖女發歎
應與人俱遂妃神童潛刊貞石百堵皆興不日而就

故此神後之靈應不泯焉莫州任丘縣狐狸淀下引
水經注云鄭縣東南隅水有狐狸淀俗亦謂掘鯉淀
非也滹沱水篇之殘簡斷文見于寰宇記者如此為
之隨方辨證焉

補
泝水

一清按水經本有泝水篇今失已矣寰宇記定州安
喜縣泝水下引水經注云泝水歷天井澤南流所播
為澤俗名為天井淀初學記引水經注云定州泝水

北流逕大核山大核山疑是大派山之訛大派山在
今阜平縣西北五里其東又有小派山以派河所經
得名說文派水出雁門後人戍夫山東北入海按山
海經郭璞註曰今滹沱水出雁門鹵城縣南武夫山
戍夫武夫皆秦戲之一名顧祖禹曰蓋以滹沱為即
派水也此說非是蓋派水與滹沱同出一山耳派水
源見說文尾見本注其中所歷之道僅有定州一語
較之他篇脫失尤甚

補
滋水

一清按方輿紀要山西蔚州靈邱縣下云山海經云
高是之山滋水出焉滋水在縣北水經注滋水逕枚
迴嶺懸流五丈湍激之聲震動山谷元和志滋水出
靈邱縣西南枚迴山懸河五丈湍激之聲響動山谷
樵棧之士咸由此渡巨木淪湑久乃方出或落崖石
無不粉碎也土地記云枚迴嶺與高是山連麓接勢
李吉甫所引疑
是鄭注文
紀要又云石銘陁在縣西水經注滋

水逕枚迴嶺東南過石銘陁有石銘其上云冀州北
界石銘陁亦見滏水注滋水與滏水發源最近故其
事兩隸而班固地理志許慎說文俱謂滋水出牛飲

山白陁

今漢書作陸字誤
當從說文作陁

谷在南行唐今行唐西去

靈邛四百餘里水源安得便出於此名勝志行唐縣
下引水經注云滋水至行唐縣鹿水出焉謂之木刀
溝入滹沱河寰宇記真定縣下引水經云滋水又東

至新市縣入滹沱河又鎮州鼓城縣下云雷源中山

記雷河溝水源出鼓城縣名勝志晉州下引水經注
云滹沱水流入雷河溝水過舊曲陽北據此則衛水
與滋水通波沿注隨地易稱矣今山西廣靈縣有滋
水流為壺流河亦名葫蘆河元和志寰宇記謂之瓠
瓠河云上槽狹下槽濶有似瓠瓠故名亦謂嘔夷河
蓋與滹水道近也而其下流則北入于桑乾疑與出
行唐之滋水有別然山海經本云高是之山滋水出
焉而南流注于滹沱則當日滋水惟南入滹沱不北

入桑乾不知何時分一支北流今鄜注既亡無從可
證又嵐州紇真山夏恒積雪鳥雀死者一日千數寰
宇記朔州鄜陽縣下引冀州圖云紇真山在城東北
三十里登之望桑乾代郡數百里內宛然夏恒積雪
彼人語曰紇真山頭凍殺雀何不飛去生處樂紇真
山即紇千山虜語紇真華言千里二語唐昭宗嘗稱
之蓋古謠諺也又祁州無極縣故安城下引水經云
故安城即魏之安鄉城魏志云明帝太和元年封外

祖甄逸為安鄉侯嫡孫象襲爵青龍二年追謚后兄
儼為安鄉侯即此城也故新城下引水經云後魏太
武帝南巡行宮築亦曰資城滋亦作資又作咨此
城因滋水所經得名水
經本有滋水篇今脫亡爾

水經注釋卷十一

欽定四庫全書

水經注釋卷十二

仁和趙一清撰

聖水 巨馬水

聖水出上谷

一清按此條經文疑有脫誤方輿紀要房山縣西大房山古碑云幽冀之奧室也山

下有聖水泉西南有伏龍穴一名龍城峪湯泉出焉又有孔水洞在山之東北懸崖千尺石竇如門深不可測與鄰氏注所云畧皆彷彿房山縣本漢良鄉范縣二縣地並屬涿郡又兼得廣陽國之薊縣于上谷無與漢上谷郡治沮陽縣其故城在今保安州東古涿鹿之地濕水注云涿水枝分入匈奴者為涿耶水而是篇注云在

上谷為涿耶水應劭以為出上谷涿鹿縣是已
下文注云聖水南流歷縣西轉即良鄉縣也

故燕地秦始皇二十三年置上谷郡王隱晉書地道
志曰郡在谷之頭故因以上谷名焉王莽改名朔調
也水在郡之西南聖水谷東南流逕大防嶺之東首
山下有石穴東北洞開高廣四五丈入穴轉更崇深
穴中有水者舊傳言昔有沙門釋惠彌者好精物隱
嘗熯火尋之傍水入穴三里有餘穴分為二一穴殊
小西北出不知趣詣一穴西南出入水經五六日方

還又不測窮深其水夏冷冬溫春秋有白魚出穴數日而返人有採捕食者美珍常味蓋亦丙穴嘉魚之流類也是水東北流入聖水聖水又東逕玉石山謂之玉石口山多珉玉燕石故以玉石名之其水伏流里餘潛源東出又東頽波瀉澗一丈有餘屈而南流也

東過良鄉縣南

聖水南流歷縣西轉又南逕良鄉縣故城西王莽之

廣陽也有防水注之水出縣西北大防山南而東南流逕羊頭阜下俗謂之羊頭溪其水又東南流至縣東入聖水聖水又南與樂水合水出縣西北大防山南東南流歷縣西而東南流注聖水又東逕其縣故城南又東逕聖聚南蓋藉水而懷稱也又東與俠河合水出良鄉縣西甘泉原東谷東逕西鄉縣故城北王莽之移風也世謂之都鄉城按地理志涿郡有西鄉縣而無都鄉城蓋世傳之非也又東逕良鄉城南

又東北注聖水世謂之挾活河又名之曰非潔之溝也

又東過長鄉縣北

一清按晉志范陽國有長鄉縣魏志作長鄉全氏曰當是陽鄉細玩注文

見可

聖水自涿縣東與桃水合首受涑水於徐城東南良鄉西分垣水世謂之南涉溝即桃水也東逕迺縣北又東逕涿縣故城下與涿水合世以為涿水亦謂之桃水水出涿縣故城西南竒溝東八里大坎下數泉

同發東逕桃仁墟北或曰因水以名墟則是桃水也

或曰終仁之故居非桃仁也

一清按桃仁乃高雲偉臣墟以人得名又傳是

終仁之故居故云非桃仁也今本誤以桃仁為桃水文義遂難通曉余按地理志桃水

上承涑水此水所發不與志同謂終為是又東北與

樂堆泉合水出堆東南流注于涑水涑水又東北

逕涿縣故城西流注于桃應劭曰涿郡故燕漢高帝

六年置其南有涑水蓋氏焉關駟亦言是矣今于涑

城南無水以應之所有惟西南有是水矣應劭又云

涿水出上谷涿鹿縣余按涿水自涿鹿東注灤水灤水東南逕廣陽郡與涿郡分水漢高祖六年分燕置涿郡涿之為名當受涿水通稱矣故郡縣氏之但物理潛通所在分發故在上谷為涿耶水山川阻濶並無沿注之理所在受名者皆是經隱顯相關遙情受用以此推之事或近矣而非所安也桃水又東逕涿

縣故城北王莽更名垣翰

一清按漢志莽改涿郡曰垣翰而涿縣下無說此當

是垣翰亭落亭字漢志注亦闕此文

晉太始元年改曰范陽郡今郡理

涿縣故城城內東北角有晉康王碑城東有范陽王
司馬馮廟碑桃水又東北與洹水會水上承涑水於
良鄉縣分桃水世謂之北涉溝故應劭曰垣水出良
鄉東迺垣縣故城北史記音義曰河間有武垣縣涿
有垣縣漢景帝中三年封匈奴降王賜為侯國

一清按漢

志垣縣屬河東郡武垣縣屬涿郡續志河間國武垣
故屬涿今注所引音義云云豈別有說乎又史表垣
侯賜索隱曰縣名屬河東則非涿之武垣可知善長
又誤武垣城在河間府西南三十八里去涿甚遠水
道亦無相通之處恐當涿郡又自王莽之垣翰亭矣
有垣縣也一統志垣城在涿州北

世謂之頃城非也又東逕頃

一清按此下有脫文

亦地名也故

有頃上言

一清按三字疑有誤

世名之頃前河又東洛水注之

水上承鳴澤渚渚方一十五里漢武帝元封四年行

幸鳴澤者也服虔曰澤名在迺縣北界即此澤矣西

則獨樹水注之水出迺縣北山東入渚北有甘泉水

注之出良鄉西山東南逕西鄉城西而南注鳴澤渚

又東逕西鄉城南又東逕垣縣而南入垣水垣水又

東逕涿縣北東流注于桃故應劭曰垣水東入桃關

駟曰至陽鄉注之

漢志涿郡良鄉縣垣水南至陽鄉入桃一清按南東當作東南

今按經脈而不能屆也桃水東入陽鄉東注聖水

漢志

涿郡涿縣桃水受首涑水分東至安次入河一清按蓋由聖水以注于巨馬河也受首當作首受 聖

水又東廣陽水注之水出小廣陽西山東逕廣陽縣

故城北又東福祿水注焉水出西山東南逕廣陽縣

故城南東入廣陽水亂流東南至陽鄉縣右注聖水

聖水又東南逕陽鄉城西不逕其北矣縣故涿之陽

亭也地理風俗志曰涿縣東五十里有陽鄉亭後分

為縣王莽時更名章武即長鄉縣也按太康地記涿
有長鄉而無陽鄉矣聖水又東逕長興

沈氏曰疑是長鄉

城

南又東逕方城縣故城李牧伐燕取方城是也魏封
劉放為侯國聖水又東左會白祀溝溝水出廣陽縣
之婁城東東南流左合婁城水水出平地導源東南
流右注白祀水亂流東南逕常道城西故鄉亭也西

去長鄉城四十里魏少帝璜甘露三年所封也

一清按魏

少帝璜以甘露三年封為常道鄉公甘露是
高貴鄉公紀年此句詞意甚晦

又東南入聖

水聖水又東南逕韓城東詩韓奕章曰溥彼韓城燕
師所完王錫韓侯其追其貊奄受北國鄭元曰周封
韓侯居韓城為侯伯言為獫狁所逼稍稍東遷也王
肅曰今涿郡方城縣有韓侯城世謂之寒號城非也
聖水又東南流右會清淀水水發西淀東流注聖水
謂之劉公口也

又東過安次縣南東入于海

聖水又東逕勃海安次縣故城南漢桓帝中平二年

封荊州刺史王敏為侯國

一清按桓帝字誤後漢書靈帝紀中平三年江夏兵

趙慈反殺南陽太守秦頡六月荊州刺史王敏討趙慈斬之蓋以有功封也二年亦是三年之誤沈氏校

本摘中平非桓帝紀年蓋考之不盡又東南流注于巨馬河而不達于

海也

巨馬河出代郡廣昌縣涑山

即涑水也有二源俱發涑山東逕廣昌縣故城南王

莽之廣屏矣魏封樂進為侯國涑水又東北逕西射

魚城東南而東北流又逕東射魚城南又屈逕其城

東竹書紀年曰荀瑤伐中山取窮魚之邛窮射字相
類疑即此城也所未詳矣涑水又逕三女亭西又逕
樓臺北左屬白澗溪水有二源合注一川川石皓然
望同積雪故以物色受名其水又東北流謂之石槽
水伏流地下溢則通津委注謂之白澗口涑水又東
北桑谷水注之水南發桑溪北注涑水涑水又北逕
小鬻東又東逕大鬻南蓋霍原隱居教授處也徐廣
云原隱居廣陽山教授數千人為王俊所害雖千古

世懸猶表二鬻之稱既無碑頌竟不知定誰居也涑水又東北歷紫石溪口與紫水合水北出聖人城北大互下東南流左會壘砢溪水蓋山崩委澗積石淪隍故溪澗受其名矣水出東北西南流注紫石溪水紫石溪水又逕聖人城東又東南右會擔車水水出擔車硎東南流逕聖人城南南流注紫石水又南注于涑水涑水又東南逕榆城南又屈逕其城東謂之榆城河涑水又南逕藏刀山下層巖辟立直上干霄

遠望崖側有若積刀鏹鏹相比咸悉西首涑水東逕
徐城北沙溝出焉世謂之沙溝水又東督亢溝出焉
一水東南流即督亢溝也一水西南出即涑水故瀆
矣水盛則長津宏注水耗則通波潛伏重源顯於迺
縣舊則川矣

東過迺縣北

涑水上承故瀆于縣北垂重源再發結為長潭潭廣
百許步長數百步左右翼帶涓流控引自成淵渚長

川漫下一十許步東南流逕迺縣故城東漢景帝中

三年以封匈奴降王隆彊

一清按漢表作陸彊此從史表

為侯國王

莽更名迺屏也謂之巨馬河亦曰渠水也又東南流

袁本初遣別將崔巨業攻固安不下退還公孫瓚追擊之於巨馬水死者六七千人即此水也又東南逕

范陽縣故城北易水注之

寰宇記易州易縣加夷城下引水經云巨馬水流逕

加夷山即睽子于山中養無目父母之所也今本無之

又東南過容城縣北

巨馬水又東酈亭溝水注之水上承督亢溝水於迺
縣東東南流歷紫淵東余六世祖樂浪府君自涿之
先賢鄉爰宅其陰西帶巨川東翼茲水枝流津津通纏
絡墟圃匪直田漁之瞻可懷信為遊神之勝處也其
水東南流又名之為酈亭溝其水又西南轉歷大利
亭南入巨馬水又東逕容城縣故城北又東督亢溝
水注之水上承涑水于涑谷引之則長津委注過之
則微川輟流水德含和變通在我東南流逕迺縣北

又東逕涿縣酈亭樓桑里南即劉備之舊里也又東
逕督亢澤澤苞方城縣縣故屬廣陽後隸于涿郡國
志曰縣有督亢亭孫暢之述畫有督亢地圖言燕大
子丹使荆軻齎入秦秦王殺軻圖亦尋滅地理書上
古聖賢冢地記曰督亢地在涿郡今安陽縣南有督
亢陌幽州南界也風俗通曰沆漭也言乎淫淫漭漭
無厓際也亢澤之無水斥鹵之謂也其水自澤枝分
東逕涿縣故城南又東逕漢侍中盧植墓南又東散

為澤渚督亢澤也北屈滙于桃水督亢水又南謂之
白溝水南逕廣陽亭西而南合枝溝溝水西受巨馬
河東出為枝溝又東注白溝白溝又南入于巨馬河
巨馬河又東南逕益昌縣濩澱水右注之水上承濩
陂於臨鄉縣故城西東南逕臨鄉城南漢封廣陽頃
王子雲為侯國一清按漢表雲以元帝初元五年封地理風俗記曰方
城南十里有臨鄉城故鄉也淀水又東南逕益昌縣
故城西南入巨馬水巨馬水東逕益昌縣故城南漢

封廣陽頃王子嬰為侯國

一清按漢表嬰以元帝永光三年封王莽之

有秩也地理風俗記曰方城縣東八十里有益昌城故縣也又東八丈溝水注之水出安次縣東北平地東南逕安次城東東南逕泉州縣故城西又南右合虜池河枯溝溝自安次西北東逕常道城東安次縣故城西晉司空劉琨所守以拒石勒也又東南至泉州縣西南東入八丈溝又南入巨馬河亂流東注也又東過勃海東平舒縣北東入于海

地理志曰涑水東南至容城入于河即濡水也蓋互以明會矣巨馬水於平舒城北南入于虜池而同歸于海也

水經注釋卷十二

欽定四庫全書

水經注釋卷十三

仁和趙一清撰

灤水

灤水出雁門陰館縣東北過代郡桑乾縣南一清按灤水俗本水

經作濕水誤也資治通鑑晉愍帝紀建興元年代公又作新平城于灤水之陽胡身之注云班固地理志右北平俊靡縣灤水南至無終東入庚師古曰灤力水翻又音卽賄翻酈道元水經注庚水與鮑丘水合俊靡在東與平城相去甚遠新平城不在此灤水之陽也據魏書道武帝西如馬邑觀灤源則灤水蓋出于馬邑而東北

流逕平城之南也。酈道元魏人也。其注水經叙代都之事。宜詳初不言平城有灑水。但言濕水。逕平城南耳。班志雁門陰館縣樓煩鄉累頭山。治水所出。東至泉州入海。師古曰。灑音力。追翻。治音弋之。翻竊謂水出累頭山。疑當時亦有累水之名。師古音從平聲。音相近也。意道元所謂濕水。即灑水也。丁度集韻。深灑灑三字同。註云。水出雁門。則亦有見於此矣。灑類篇音魯水。翻蓋梅磗。既不知灑水之非灑水。又不識濕字之義。宜其輾轉支離。反覆而不可通也。說文灑水出雁門陰館累頭山東入海。或曰。治水也。从水。灑聲。力追切。灑水出右北平。俊靡東南入庚。从水。壘聲。力軌切。其言與漢志合。此篇之水是灑水。非灑水也。而丁度以為灑灑同。出雁門是為悠謬也。至于濕本濟濕之濕音他。合翻說文作濕。隸改曰為田。又省一糸作灑字。而濕字反相沿作燥。溼之溼矣。灑水。導源累頭山。故集韻又同出灑灑字也。灑為灑之省文。然已混于濟灑之灑矣。宜別白之。

灤水出于累頭山一曰治水泉發于山側沿波歷澗
東北流出山逕陰館縣故城西縣故樓煩鄉也漢景

帝後三年置王莽更名富臧矣

一清按漢志作富代

魏天安三

年齊平徙其民於縣立平齊郡

一清按天安是魏獻文帝年號只得一年

明年秋八月即改為皇興不當云三年也方輿紀要
云平齊城在大同府西二十里漢平城縣地宋志秦

始五年魏人徙并城歷城民望于桑乾因立平齊郡
以處之秦始五年正皇興之三年也然于天安之號

又不符矣顧氏所引又不見于沈約志事在魏書慕容
容白曜崔元伯劉休賓房崇吉諸傳隋書地理志郡

尋廢故地形志無此郡也

灤水又東北流左會桑乾水縣西北上

平洪源七輪謂之桑乾泉即涿涑水者也耆老云其

水潛承太原汾陽縣北通燕京山之天池池在高原

之上世謂之天池方八里餘

元和志池週迴八里

其水澄渟鏡

淨潭而不流若安定朝那之湫淵也清水流潭皎焉

冲照池中曾無片草及其風籜有淪輒有小鳥翠色

投淵銜出若會稽之耘鳥也其水陽焊不耗陰霖不

濫無能測其淵深也古老相傳言嘗有人乘車於池

側忽遇大風飄之於水有人獲其輪於桑乾泉故知

二水潛流通注矣池東隔阜又有一石池方可五六
十步清深鏡潔不異天池桑乾水自源東南流右會
馬邑川水水出馬邑西川俗謂之磨川矣蓋狄語音
譌馬磨聲相近故耳其水東逕馬邑縣故城南干寶
搜神記曰昔秦人築城於武周塞內以備胡城將成
而崩者數矣有馬馳走一地周旋反覆父老異之因
依以築城城乃不崩遂名之為馬邑或以為代之馬

城也

方輿紀要馬城在大同府東北境漢縣屬代郡
東部都尉治此亦漢元初六年鮮卑寇馬城塞

鄧遵擊破之魏明帝太和二年鮮卑軻比能圍護烏桓校尉田豫于馬城即此十三州志馬城在高柳東二百四十里諸記紛競未識所是漢以斯邑封韓王信後

為匈奴所圍信遂降之王莽更名之曰章昭其水東流注桑乾水桑乾水又東南流水南有故城東北臨河又東南右合灤水亂流枝水南分桑乾水又東左合武周塞水出故城東南流出山逕日沒城南蓋夕陽西頽戎車所薄之城故也東有日中城城東又有早起城亦曰食時城在黃瓜阜北曲中其水又東

流右注桑乾水桑乾水又東南逕黃瓜阜曲西又屈

逕其堆南徐廣曰猗盧廢嫡子曰利孫于黃瓜堆者

也全氏曰道元身為拓跋臣子其不敢斥言六脩之變明矣徐廣曰一條疑是後人所加又東

右合枝津枝津上承桑乾河東南流逕桑乾郡北大

魏因水以立郡受厥稱焉又東北左合夏屋山水水

南出夏屋山之東谿西北流逕故城北所未詳也又

西北入桑乾水桑乾枝水又東流長津委浪通結

兩湖東湖西浦淵潭相接水至清深晨鳧夕雁泛濫

其上黛甲素鱗潛躍其下俯仰池潭意深魚鳥所寡
惟良木耳俗謂之南池池北對淫陶縣之故城南故
曰南池也池水又東北注桑乾水與灤水並受通稱
矣灤水又東北逕巨魏亭西蓋皇魏天賜三年之所
經建也灤水又東北逕白狼堆南魏烈祖道武皇帝
於是遇白狼之瑞故斯阜納稱焉阜上有故宮廟樓
榭基雉尚崇每至鷹隼之秋羽獵之日肆閱清野為
昇眺之逸地矣灤水又東流四十九里東逕巨魏亭

北又東崞川水注之水南出崞山縣故城南

一清按兩漢志

俱作崞縣地形志恒州繁峙郡領縣曰崞山則正道元時新制不得云故城也蓋其率筆耳

王莽

之崞張也縣南面元岳右背崞山處二山之中故以

崞張為名矣其水又西出山謂之崞口北流逕繁峙

縣故城東王莽之當要也又北逕巨魏亭又北逕劇

陽縣故城西王莽之善陽也按十三州志曰在陰館

縣東北一百三里其水又東注于灤水灤水又東逕

班氏縣南如渾水注之水出涼城旋鴻縣

一清按魏書地形志

梁成郡桓鴻縣註云一本作
祇鴻與此異文疑是史誤

西南五十餘里東流逕

故城南北俗謂之獨谷孤城水亦即名焉東合旋鴻

池水水出旋鴻縣東山下水積成池北引魚水水出

魚谿南流注池池水吐納川流以成巨沼東西二里

南北四里北對涼川城之南池池方五十里俗名乞

伏袁河雖隔越山阜鳥道不遠雲霞之間常有朱氏謀埤

箋云下脫西南流逕旋鴻縣南右合如渾水一清按

宇記雲中縣下引水經注曰雲中街河水西南合桑
乾河水今本無之名勝志引郡國志以為如渾水也

是總二水之名矣如渾水又東南流逕永固縣縣以太和中因山堂之目以氏縣也右會羊水水出平城縣之西苑外武周塞北出東轉逕燕昌城南按燕書建興十年慕容寶自河西還軍敗於參合死者六萬人十一年垂衆北至參合見積骸如山設祭弔之死者父兄皆號泣六軍哀慟垂慚憤嘔血因而寢疾焉舉過平城北四十里疾篤築燕昌城而還即此城也北俗謂之老公城羊水又東注于如渾水亂流逕方

嶺上有文明太皇太后陵陵之東北有高祖陵二陵
之南有永固堂堂之四周隅雉列榭階欄檻及扉戶
梁辟椽瓦悉文石也檐前四柱採洛陽之八風谷黑
石為之雕鏤隱起以金銀間雲雉有若錦馬堂之內
外四側結兩石趺張青石屏風以文石為緣並隱起
忠孝之容題刻貞順之名廟前鐫石為碑獸碑石至
佳左右列栢四周迷禽閣日院外西側有思遠靈圖
圖之西有齋堂南門表二石闕闕下斬石累結御路

下望靈泉宮池皎若圓鏡矣羊水又東注

一清按五字重文宜

衍如渾水又南至靈泉池枝津東南注池池東西一

百步南北二百步池渚舊名白楊泉泉上出白楊樹

因以名焉其猶長楊五柞之流稱矣南面舊京北背

方嶺左右山原亭觀繡峙方湖反景若三山之倒水

下如渾又南逕北宮下舊宮人作薄所在

一清按作薄江水篇

注作作部沈約宋書亦作作部均沿習之非據漢書宣帝紀云為娶暴室嗇夫許廣漢女應劭曰暴室宮人獄也今曰薄室師古曰暴室者掖庭主織作染練之署故謂之暴室取暴曬為名耳或云薄室者薄亦

暴也今俗語亦云薄曬蓋暴室織務既多因置獄官
主治其罪人故往往云暴室獄耳然本非獄名應說
失之矣此云作薄與穀水篇注薄隸諸徒咸敬
之文皆即薄室之薄或又訛作薄字者誤也 如渾

水又南分為二水一水西出南屈入北苑中歷諸池

沼又南逕虎圈東魏太平真君五年成之以牢虎也

季秋之月聖上親御園上勅虎士効力於其下事同

奔戎生制猛獸即詩所謂袒裼暴虎獻于公所也故

魏有捍虎圖也

庾林曰後魏書曰王叡字洛城晉陽人姿貌偉麗文明太后臨朝叡見幸

為侍中吏部尚書愛寵日隆大和二年高祖及太后
率百僚臨虎園有逸虎登門閣道幾至御坐侍御驚

靡敵執戟禦之虎乃退親任轉重進爵中山王敵薨
太后親臨哀勸葬城東高祖登城樓望之立祠都南
又詔褒敵圖其捍虎狀于諸殿高允為讚京師士女
造新聲而弦歌之名曰中山樂善長托喻奔戎蓋晦
其事微露捍
虎亦迂詞也 又逕平城西郭內魏太常七年所城也

城周西郭外有郊天壇壇之東側有郊天碑建興四
年立其水又南屈逕平城縣故城南史記曰高帝先
至平城史記音義曰在雁門即此縣矣王莽之平順
也魏天興二年遷都於此太和十六年破太華安昌
諸殿造太極殿東西堂及朝堂夾建象魏乾元中陽

端門東西二掖門雲龍神虎中華諸門皆飾以觀閣
東堂東接太和殿殿之東階下有一碑太和中立石
是洛陽八風谷之縑石也殿之東北接紫宮寺南對
承賢門門南即皇信堂堂之四周圍古聖忠臣烈士
之容刊題其側是辯章郎彭城張僧達樂安蔣少遊

于一清按下有脫文魏書藝術傳蔣少遊樂安博昌
人慕容白曜之平泉陽見俘于平城充平齊戶後
配雲中為兵性機巧頗能刻畫高祖文明太后常因
密晏謂百官曰本謂少遊作師耳高允老公乃言其
人士驟被引命屑屑禁闥以規矩刻績為務因此大
蒙恩錫後于平城將營太廟太極殿遣少遊乘傳詣

洛準量魏晉基趾少遊有文藻而不得伸其才用恒以剗刷絕尺碎劇匆匆徒倚園湖城殿之側識者為之慨嘆而乃坦而為已任不告疲

恥

堂南對白臺臺

景明二年卒贈龍驤將軍青州刺史

甚高廣臺基四周列壁閣道自內而升國之圖籙秘籍悉積其下臺西是朱明閣直侍之官出入所由也其水夾御路南流逕蓬臺西魏神瑞三年又建白樓樓甚高竦加觀榭於其上表裏飾以石粉暘曜建素赭白綺分故世謂之白樓也後置大鼓於其上晨昏伐以千椎為城里諸門啟閉之候謂之戒晨鼓也又

南逕皇舅寺西是太師昌黎王馮晉國所造有五層浮圖其神圖象皆合青石為之加以金銀火齊衆綵之上煒煒有精光又南逕永寧七級浮圖西其制甚妙工在寡雙又南遶出郊郭弱柳蔭街絲楊被浦公私引裂用周圍挽長塘曲池所在布護故不可得而論也一水南逕白登山西服虔曰白登臺名也去平城七里如淳曰平城傍之高城若邛陵矣今平城東十七里有臺即白登臺也臺對南置阜即白登山也

故漢書稱上遂至平城上白登者也為匈奴所圍處
孫暢之述畫曰漢高祖被圍七日陳平使能畫作美
女送於冒頓閼氏恐冒頓勝漢其寵必衰說冒頓解
圍於此矣其水又逕寧先宮東獻文帝之為太上皇
也所居故宮矣宮之東次下有兩石柱是石虎鄴城
東門石橋柱也按柱勒趙建武中造以其石作工妙
徙之於此余為尚書祠部與宜都王穆羆同拜北郊
親所經見柱側悉鏤雲炬上作蟠螭甚有形勢信為

工巧去子丹碑則遠矣其水又南逕平城縣故城東
司州代尹治皇都洛陽以為恒州水左有大道壇廟
始光二年少室道士寇謙之所議建也兼諸嶽廟碑
亦多所署立其廟階三成四周欄檻上階之上以木
為員基令干相枝梧以板砌其上欄陛承阿上員制
如明堂而專室四戶室內有神坐坐右列玉磬皇輿
親降受錄靈壇號曰天師宣揚道式暫重當時壇之
東北舊有靜輪宮魏神麈四年造抑亦栢梁之流也

臺榭高廣超出雲間欲令上延霄客下絕囂浮太平
真君十一年又毀之物不傳固白登亦繼褫矣水右
有三層浮圖真容驚架悉結石也裝制麗質亦盡美
善也東郭外太和中閣人宕昌公鉗耳慶時立祇洹
舍於東罩椽瓦梁棟臺辟櫺陛尊容聖像及床坐軒
帳悉青石也圖制可觀所恨惟列辟合石踈而不密
庭中有祇洹碑碑題大篆非佳耳然京邑帝里佛法
豐盛神圖妙塔桀峙相望法輪東轉茲為上矣其水

自北苑南出歷京城內河干兩涘太和十年累石結岸夾塘之上雜樹交蔭郭南結兩石橋橫水為梁又南逕藉田及藥圃西明堂東明堂上圓下方四周十二戶九室而不為重隅也室外柱內綺井之下施機輪飾縹碧仰象天狀畫北道之宿焉蓋天也每月隨斗所建之辰轉應天道此之異古也加靈臺於其上

下則引水為辟雍水側結石為塘事準古制是太和中之所經建也如渾水又南與武周川水會水出縣

西南山下二源翼導俱發一山東北流合成一川北
流逕武周縣故城西王莽之桓周也又東北右合黃
水水西出黃阜下東北流聖山之水注焉水出西山
東流注于黃水黃水又東注武周川又東歷故亭北
右合火山山西谿水水導源火山西北流山上有火井
南北六七十步廣減尺許源深不見底炎勢上升常
若微雷發響以草爨之則烟騰火發東方朔神異傳
云南方有火山焉長四十里廣四五里其中皆生不

燼之木晝夜火然暴雨猛風不滅火中有鼠重百斤
毛長二尺餘細如絲色白時時出外以水逐而沃之
則死取其毛績以為布謂之火浣布是山亦其類也
但卉物則不能然其山以火從地中出故亦名熒臺
矣火井東五六尺又東有湯井廣輪與火井相狀熱
勢又同以草內之則不然皆沾濡露結故俗以湯井
為目井東有火井祠以時祀祭焉井北百餘步有東
西谷廣十許步南崖下有風穴厥大容人其深不測

而穴中肅肅常有微風雖三伏盛暑猶須襲裘寒吹
凌人不可暫停而其山出雛鳥形類雅鳥純黑而姣
好音與之同續采紺發嘴若丹砂性馴良而易附
童幼子捕而執之曰赤嘴鳥亦曰阿雛鳥按爾雅純
黑反哺謂之慈鳥小而腹下白不反哺者謂之雅鳥
白頸而羣飛者謂之燕鳥大而白頸者謂之蒼鳥爾
雅曰鶯斯卑居也孫炎曰卑居楚鳥捷為舍人以為
辟屋說文謂之雅雅楚鳥莊子曰雅賈矣馬融亦曰

賈烏者也又按瑞應圖有三足烏赤烏白烏之名而無記于此烏故書其異耳恒山以北並有此矣其水又東北流注武周川水武周川水又東南流水側有石祗洹舍並諸窟室比邛尼所居也其水又東轉逕靈巖南鑿石開山因崖結構真容巨壯世法所稀山堂水殿烟寺相望林淵錦鏡綴目新眺川水又東南流出山魏土地記曰平城西三十里武周塞口者也自山口枝渠東出入苑溉諸園池苑有洛陽殿殿北

有宮館一水自枝渠南流東南出火山水注之水發
火山東谿東北流出山山有石炭火之熱同樵炭也

又東注武周川逕平城縣東南流注如渾水又南流

逕班氏縣故城東王莽之班副也

一清按漢志分註引秦地圖書班氏

莽曰關駟十三州志曰班氏縣在郡西南百里北俗班副

謂之去留城也如渾水又東南流注于灤水灤水又

東北逕平邑縣故城南趙獻侯十三年城平邑地理

志曰屬代王莽所謂平胡也十三州志曰城在高柳

南百八十里北俗謂之醜寅城灤水又東逕沙陵南

魏金田之地也事同曹武鄴中定矣

一清按鄴中定未詳三國志注

引魏畧曰河北始開以王脩為司金中郎將陳黃白
異議議不傳而魏武與脩書云初立司金之官又引
過父陶正桑宏羊為喻續漢書百官志曰本注曰郡
國鹽官鐵官本屬司農中興皆屬郡縣迨曹公始制
司金中郎將利權始歸于上矣魏書食貨志云世宗
延昌二年秋恒州上言白登山有銀鑛八石得銀七
兩錫三百餘斤其色潔白有踰上品詔置銀官常令
採鑄元魏金田之制殆彷彿曹氏歸權于上之意乎金
田即銀鑛禹貢揚州貢金三品叔治黃
白異議蓋舍銅而專言金銀之利也

灤水東逕

氏一清按孟康曰音權精

縣故城北王莽更名之曰标聚也十

三州志曰縣在高柳南百三十里俗謂之苦刀干城
矣灤水又東逕道人縣故城南地理志曰王莽之道
仁也地理風俗記曰初築此城有仙人遊其地故因
以為城名矣今城北有淵潭而不注故俗謂之為平
湖也十三州志曰道人城在高柳東八十里所未詳
也灤水又東逕陽原縣故城南地理志曰代郡之屬
縣也北俗謂之北邠州城灤水又東流安陽水注之
水出縣東北澤中北俗謂之太拔迴水水自澤東南

流注于灤水又東逕東安陽縣故城北趙惠文王三

年封長子章為代安陽君此即章封邑

一清按史記章是武靈王

子酈氏誤記也王莽之竟安也地理風俗記曰五原有西安

陽故此加東也灤水東逕昌平縣溫水注之水出南

墳下三源俱導合而南流東北逕

一清按下有脫文

灤水灤

水又東逕昌平縣故城北王莽之長昌也昔牽招為

魏鮮卑校尉屯此

按一統志昌平故城在蔚州北魏太和中置漢昌平縣屬上谷郡今

順天府昌州界是也今蔚州乃漢代郡地漢時桑乾為代郡治不應上谷之縣反在其西昌平縣是後魏

所僑置水經注以為即牽招所屯非是地形志平昌郡領昌平縣天平中置而失太和所置郡縣事也

灤水又東北逕桑乾縣故城西又屈逕其城北王莽更名之曰安德也魏土地記曰代城北九十里有桑乾城城西渡桑乾水去城十里有溫湯療疾有驗經言出南非也蓋誤證矣魏任城王彰以建安二十三年伐烏丸入涿郡逐北遂至桑乾止於此也灤水又東流和夷水注之水出平舒縣東逕平舒縣之故城南澤中史記趙孝成王十九年以汾門予燕易平舒

徐廣曰平舒在代

按史記趙世家孝成王十九年趙與燕易土以龍兒汾門臨樂與燕

以葛武陽平舒與趙正義曰括地志云故葛城又名

西河城在瀛州高陽縣西北五十里平舒故城在蔚

州靈邱縣北九十三里夫既知葛城在高陽則武陽

平舒必相去不遠先是惠文王二十一年徙漳水武

平西二十七徙漳水武平南正義曰括地志云武

平亭今名渭城在清州文安縣北七十二里是時趙

境東逼故燕以三邑予之易土葛城廢縣今安州治

武陽地闕平舒今大城縣也漢曰東平舒屬勃海郡

師古曰代郡有平舒故此加東是也徐 手莽更名之

廣既誤証括地志又因之均為非矣

曰平葆後漢世祖建武七年封揚武將軍馬成為侯

國其水控引衆泉以成一川魏土地記曰代城西九

十里有平舒城西南五里代水所出東北流言代水
非也祁夷水又東北逕蘭亭南又東北逕石門關北
舊道出中山故關也又東北流水側有故池按魏土
地記曰代城西南三十里有代王魚池池西北有代
王臺東去代城四十里祁夷水又東北得飛狐谷即
廣野君所謂杜飛狐之谷也蘓林據酈公之說言在
上黨即實非也如淳言在代是矣晉建興中劉琨自
代出飛狐口奔於安次即於此道也魏土地記曰代

城南四十里有飛狐關關水西北流逕南舍亭西又
逕句璣亭西西北注祁夷水祁夷水又東北流逕代
城西盧植言初築此城板榦一夜自移于此故代西
南五十里大澤中營城自護結葦為九門於是就以
為治城圓匝而不方周四十七里開九門更名其故

城曰東城趙滅代

一清按此下有缺文

漢封孝文為代王

一清按前

漢代郡治桑乾後漢移治高柳漢志代郡下應劭曰故代國孝文所都非也文帝初封代王都晉陽徙中都未嘗
居代
梅福上事曰代谷者恒山在其東北塞在其

北谷中之地。上谷在東。代郡在西。是其地也。王莽更之。

曰厭狄亭。魏土地記曰。城內有二泉。一源流出城西。

門一源。流出城北。門二源。皆北注。代水。

一清按代城今蔚州治也。

東城今蔚州東二十里之代王城也。城內有泉二。東西分流。與道元說合。是此文當在東城之下。恐後來傳寫倒錯耳。 祁夷水又東北。熱水注之。水出綾羅澤。澤際

有熱水亭。其水東北流。注祁夷水。又東北。山谷水注之。水出昌平縣故城南。又東北。入祁夷水。祁夷水右會逆水。水導源將城東。西北流。逕將城北。在代城東北。

一十五里疑即東代矣而尚傳將城之名盧植曰此

城方就而板榦自移

劉昭郡國志補註引干寶搜神記曰代城始築立板榦一旦亡

西南移四五十里於澤中自立結葦為外門因就營築焉故其城周圍三十五丈為九門故城處呼之以

為東城一清按魏書李元護傳叔恤為東代郡太守蓋太和遷洛以後以平城為代郡故以漢代郡之代

縣為東代地形志代郡秦置孝昌中陷天平二年置領平城太平武周永固四縣而無東代郡且後魏時

代郡又屬肆州本紀太和十一年肆州之代郡民饑靈徵志神麇二年白鹿見代郡倒刺山皆故代縣地

而志又缺則應劭曰城徙西南去故代五十里故名知所遺多矣

代曰東城或傳書倒錯情用疑焉而無以辨之逆水

又西流注于祁夷之水逆之為名以西流故也祁夷水東北逕青牛淵水自淵注之者彥云有潛龍出於茲浦形類青牛焉故淵潭受名矣潭深不測而水周多蓮藕生焉祁夷水又北逕一故城西西去代城五十里又疑是代之東城而非所詳也又逕昌平郡東

魏太和中置西南去故城六十里又北連水

一清按黃氏本

作蓮水非

入焉水出雒瞽

一清按孟康曰音句無師古曰雒音工頭反瞽音莫豆反

東西北流逕雒瞽縣故城南又西逕廣昌城南

寰宇記蔚

州飛狐縣下引水經云廣昌縣有古板殿城今本無
之一清按北史魏紀明元帝永興四年八月壬子章
西宮臨板殿大饗

羣臣即是處也

魏土地記曰代南二百里廣昌

城南通大嶺即此非也十三州記曰平舒城東九十

里有廣平城疑是城也尋其名狀忖理為非又西涇

王莽城南又西到刺山水注之水出到刺山西山甚

層峻未有升其巔者魏土地記曰代城東五十里有

到刺山山上有佳大黃也

一清按寰宇記云出椒大黃

其水北流

涇一故亭東城北有石人故世謂之石人城西北注

連水又北逕當城縣故城西高祖十二年周勃定代
斬陳豨于當城即此處也應劭曰當桓都山作城故
曰當城也又逕故代東而西北流注祁夷水祁夷水
西有隨山山上有神廟謂之女郎祠方俗所祠也祁
夷水又北逕桑乾縣故城東而北流注于灤水地理

志曰祁夷水出平舒縣北至桑乾入灤是也

全氏曰按鄭康

成注職方誤以嘔夷為祁夷而顏師古從之不知班
志已自了然蓋嘔夷滙水也故于滙河之下大書曰
并州川則其為嘔夷水無疑矣入灤今灤水又東北
本漢書作入沽蓋誤字也當作入治

逕石山水口水出南山北流逕空侯城東魏土地記
曰代城東北九十里有空侯城者也其水又東北流
注灤水灤水又東逕潘縣故城北東合協陽關水
出協溪魏土地記曰下洛城西南九十里有協陽關
關道西通代郡其水東北流歷笄頭山關駟曰笄頭
山在潘城南卽是山也又北逕潘縣故城左會潘泉
故瀆瀆舊上承潘泉於潘城中或曰舜所都也魏土
地記曰下洛城西南四十里有潘城城西北三里有

歷山山上有虞舜廟十三州記曰廣平城東北一百

一十里有潘縣地理志曰王莽更名樹武其泉從廣
十數步東出城注協陽關水雨盛則通注陽旱則不
流唯泝泉而已關水又東北流注于灤水又東逕雍
洛城南魏土地記曰下洛城西南二十里有雍洛城
桑乾水在城南東流者也灤水又東逕下洛

一清按漢志作

下落縣故城南王莽之下忠也魏燕州廣寧縣廣寧郡

治一清按地形志無此文蓋孝昌後已廢省矣魏書
穆罷傳太和十六年除燕州刺史鎮廣寧即此

魏土地記曰去平城五十里城南二百步有堯廟灤水又東逕高邑亭北又東逕三臺北灤水又東逕無

鄉城北地理風俗記曰燕語呼亡為無

一清按亡與無同詩何有

何亡可證也佩觿集河朔謂無曰毛後漢書馮衍傳饑者毛食章懷註云案衍集毛字作無今俗語猶然者或古亦通乎無鄉以舊俗呼為毛鄉酈故引地理風俗記之文以釋之不然亡無音義並同何須說得

其城在今直隸保安州南

今改宜鄉也

一清按地形志東燕州大和中分恒州東部置孝昌

中陷天平中領流民置寄治幽州宜都城即宜鄉也

灤水又東溫泉水注之水

上承溫泉於橋山下魏土地記曰下洛城東南四十

里有橋山山下有溫泉泉上有祭堂雕簷華宇被于
浦上石池吐泉湯湯其下炎涼代序是水灼焉無改
能治百疾是使赴者若流池水北流入于灤水灤水
又東左得于延水口水出塞外柔元鎮西長川城南
小山山海經曰梁渠之山無草木多金玉脩水出焉
東南流逕且如縣故城南應劭曰當城西北四十里
有且如城故縣也代稱不拘名號變改校其城郭相
去遠矣地理志曰中部都尉治于延水出縣北塞外

即脩水也脩水又東南逕馬城縣故城北地理志東部都尉治十三州志曰馬城在高柳東二百四十里俗謂是水為阿頭阿頭出戎方土俗變名耳又東逕零丁城南右合延鄉水水出縣西山東逕延陵縣故城北地理風俗記曰當城西北有延陵鄉故縣也俗指謂之琦城川又東逕羅亭又東逕馬城北又東注脩水又東南於大甯郡北右注雁門水山海經曰雁門之水出于雁門之山雁出其門在高柳北高柳在

代中其山崇巒疊嶽霞舉雲高連山隱隱東出遼塞

其水東南流逕高柳縣故城北舊代郡治秦始皇二

十三年虜趙王遷以國為郡王莽之所謂厭狄也一清

按此是前漢西部都尉治後漢代郡治此建武十九年世祖封代相堪為

侯國昔牽招斬韓忠於此處一清按庖林曰魏志牽招傳韓忠之頭非斷子

經之手注誤也又招傳稱遣詣柳城地理志高柳屬代郡柳城屬遼西相去遠矣善長又誤城在

平城東南六十七里於代為西北也雁門水又東南

流屈逕一故城背山面澤北俗謂之叱嶮城雁門水

又東南流屈而東北積而為潭其陂斜長而不方東北可二十餘里廣一十五里蒹葭叢生焉敦水注之其水導源西北少咸之山南麓東流逕叅合縣故城南地理風俗記曰道人城北五十里有叅合鄉故縣也敦水又東澁水注之水出東阜下西北流逕故城北俗謂之和堆城又北合敦水亂流東北注雁門水故山海經曰少咸之山敦水出焉東流注于雁門之水郭景純曰水出雁門山謂斯水也雁門水又東北

入陽門山謂之陽門水與神泉水合水出葦壁北水
有靈焉及其密雲不雨暘旱愆期多請禱焉水有二
流世謂之比連泉一水東北逕一故城東世謂之石
虎城而東北流注陽門水又東逕三會亭北又東逕
西伺道城北又東託台谷水注之水上承神泉於葦
壁北東逕陽門山南託台谷謂之託台水汲引泉谿
渾濤東注行者間一十餘渡東逕三會城南又東逕
託台亭北又東北逕馬頭亭北東北注雁門水雁門

水又東逕大冨郡北魏太和中置有脩水注之即山海經所謂脩水東流注于雁門水也地理志有于延水而無雁門脩水之名山海經有雁門之目而無說

于延河

一清按漢志雁門郡疆陰縣諸間澤在東北而是澤竟無聞焉

自下亦通謂

之于延水矣水側有桑林故時人亦謂是水為藜桑河也斯乃北土寡桑至此見之因以名焉于延水又

東逕罽城南按史記蔡澤燕人也謝疾歸相秦號罽

成君疑即澤所邑也

一清按是時秦未并燕地恐悞寰宇記許州許昌縣有剛城燕

人蔡澤封此

世名武置城于延水又東左與寧川水合水

出西北東南流逕小寧縣故城西東南流注于延水

又東逕小寧縣故城南地理志寧縣也西部都尉治

王莽之博康也魏土地記曰大寧城西二十里有小

寧城昔邑人班

一清按樂史曰或作瑕

丘仲居水側賣藥于寧

百餘年人以為壽後地動宅壞仲與里中數十家皆

死民人取仲尸棄于延水中收其藥賣之仲被裘從

而詰之此人失怖叩頭求哀仲曰不恨汝故使人知

我耳去矣後為夫餘王驛使來甯此方人謂之謫仙也于延水又東黑城川水注之水有三源出黑土城西北竒源合注總為一川東南逕黑土城西又東南流逕大甯縣西而南入延河延河又東逕大甯縣故城南地理志云廣寧也王莽曰廣康矣魏土地記曰城在鳴雞山西十里南通大道西達寧州于延水又東南逕鳴雞山西魏土地記曰下洛城東北三十里有延河東流北有鳴雞山史記曰趙襄子殺代王于

夏屋而并其土襄子迎其姊於代其姊代之夫人也
至此曰代已亡矣吾將何歸乎遂磨笄於山而自殺
代人憐之為立祠焉因名其山為磨笄山每夜有野
雞羣鳴于祠屋上故亦謂之為雞鳴山魏土地記云
代城東南二十五里有馬頭山其側有鍾乳穴趙襄
子既害代王迎姊姊代夫人夫人曰以弟慢夫非仁
也以夫怨弟非義也磨笄自刺而死使者自殺民憐
之為立神屋於山側因名之為磨笄之山未詳孰是

于延水又南逕且居縣故城南王莽之久居也其水

東南流注于灤水地理志曰于延水東至廣寧入沽

非矣

一清按今本漢書作東至寧入沽誤也地理志上谷郡有寧縣有廣寧縣據是注當作廣寧非

寧也入沽當作入治治即灤也道元故以為非觀此則六朝時已訛治為沽矣

又東過涿鹿縣北

涿水出涿鹿山世謂之張公泉又東北流逕涿鹿縣

故城南王莽所謂褫陸也

一清按漢志作褫陸音如栝徧九州之栝黃帝

與蚩尤戰于涿鹿之野留其民于涿鹿之阿即於是

處也其水又東北與阪泉合其水導源縣之東泉魏
土地記曰下洛城東南六十里有涿鹿城城東一里
有阪泉泉上有黃帝祠晉太康地理記曰阪泉亦地
名也泉水東北流與蚩尤泉會水出蚩尤城城無南
一清按黃氏本作東面魏土地記稱涿鹿城東南六里有蚩尤
城泉水淵而不流霖雨併則流注阪泉亂流東北入
涿水涿水又東逕平原郡南魏徙平原之民置此故
立僑郡以統流雜涿水又東北逕祚亭北而東北入

灑水亦云涿水枝分入匈奴者謂之涿耶水地理潛顯難以究昭非所知也灑水又東南左會清夷水亦謂之滄河也水出長亭南西逕北城村故城北又西北平鄉川水注之水出平鄉亭西西北流注清夷水清夷水又西北逕陰莫亭在居庸縣南十里清夷水又西會牧牛山水魏土地記曰沮陽城東八十里有牧牛山下有九十九泉即滄河之上源也山在縣東北三十里山上有道武皇帝廟耆舊云山下亦有百

泉競發有一神牛駁身自山而降下飲泉竭故山得其名今山下導九十九泉積以成川西南流谷水與浮圖溝水注之出夷輿縣故城西南王莽以為朔調亭也其水俱西南流注于滄水又西南右合地裂溝古老云晉世地裂分此界間成溝壑有小水俗謂之分界水南流入滄河又西逕居庸縣故城南魏上谷郡治昔劉虞攻公孫瓚不剋北保此城為瓚所擒有粟水入焉水出縣下城西枕水又屈逕其縣南南注

滄河又西右與陽溝水合水出縣東北西南流逕居庸縣故城北西逕大翻小翻山南高巖截雲層陵斷霧雙阜共秀競舉羣峰之上郡人王次仲少有異志年及弱冠變蒼頡舊文為今隸書秦始皇時官務煩多以次仲所易文簡便於事要竒而召之三徵而輒不至次仲履真懷道窮數術之美始皇怒其不恭令檻車送之次仲首發於道化為大鳥出其車外翻飛而去落二翻於斯山故其峰巖有大翻小翻之名矣

魏土地記曰沮陽城東北六十里有大翻小翻山
上神名大翻神山屋東有溫湯水口其山在縣西北
二十里峯舉四十里上廟則次仲廟也右出溫湯療
治萬病泉所發之麓俗謂之土亭山此水炎熱倍甚
諸湯下足便爛人體療疾者要須別引消息用之耳
不待言一清按下有缺文大翻山東其水東南流左會陽溝
水亂流南注滄河滄河又左得清夷水口魏土地記
曰牧牛泉西流與清夷水合者也自下二水互受通

稱矣清夷水又西靈泉水注之水出馬蘭西澤中衆泉瀉溜歸于澤澤水所鍾以成溝瀆瀆水又左與馬蘭谿水會水導源馬蘭城城北負山勢因阿仍谿民居所給惟仗此水水南流出城東南入澤水澤水又南逕靈亭北又屈逕靈亭東次仲落鳥翮於此故是亭有靈亭之稱矣其水又南流注于清夷水清夷水又西得泉溝水水導源川南平地北注清夷水清夷水又西南得桓公泉蓋齊桓公霸世北伐山戎過孤

竹西征東馬縣車上卑耳之西極故水受斯名也水源出沮陽縣東而西北流入清夷水清夷水又西逕沮陽縣故城北秦始皇上谷郡治此王莽改郡曰朔調縣曰沮陰闕駟曰涿鹿東北至上谷城六十里魏土地記曰城北有清夷水西流也其水又屈逕其城西南流注于灤水灤水南至馬陘山謂之落馬洪

又東南出山

灤水又南入山瀑布飛梁縣河注壑瀟瀟十許丈謂

之落馬洪抑亦孟門之流也漂水自南出山謂之清
泉河俗亦謂之曰干水非也漂水又東南逕良鄉縣
之北界歷梁山南高梁水出焉

過廣陽薊縣北

一清按章懷後漢書注曰薊縣名本字
從契从邑見說文許慎曰周封皇帝之

後于邾从邑契聲讀若薊上谷有邾縣而薊
字下云共也則非地名書傳皆相沿作薊字

漂水又東逕廣陽縣故城北謝承後漢書曰世祖與
銚期出薊至廣陽欲南行即此城也謂之小廣陽漂
水又東北逕薊縣故城南魏土地記曰薊城南七里

有清泉河而不逕其北蓋經誤證矣昔周武王封堯

後於薊今城內西北隅有薊邶因邶以名邑也猶魯

之曲阜齊之營邶矣武王封召公之故國也全氏曰薊與燕

各是一國其後燕并秦始皇二十三年滅燕以為廣

陽郡漢高帝以封盧綰為燕王更曰燕國顧氏炎武北平古今

記云史記始皇紀三十六郡無廣陽之名當以昭帝

置者為定地理志廣陽國高帝燕國昭帝元鳳元年

為廣陽郡是也王莽改曰廣公縣曰代成一清按漢志云莽

城有萬載宮光明殿一清按漢書作明光殿論衡亦曰燕王旦在明光宮則光明字

疑東掖門下舊慕容雋立銅馬像處昔慕容廆有駿

馬赭白有奇相逸力至雋光壽元年齒四十九矣而

駿逸不虧雋奇之比鮑氏驄命鑄銅以圖其像親為

銘讚錫頌其傍像成而馬死矣大城東門內道左有

魏征北將軍建成鄉景侯劉靖碑晉司隸校尉王密

表靖功加於民宜在祀典以元康四年九月二十日

刊石建碑揚于後葉矣灤水又東與洗馬溝水合水

上承薊水西注大湖湖有二源水俱出縣西北平地

導源流結西湖湖東西二里南北三里蓋燕之舊池也
淶水澄澹川亭望遠亦為遊矚之勝所也湖水東流為洗馬溝側城南門東注昔鉞期奮戟處也其水又東入灤水灤水又東逕燕王陵南陵有伏道西北出薊城中景明中造浮圖建刹窮泉掘得此道王府所禁莫有尋者通城西北大陵而是二

一清按此處有脫文基

趾磐固猶自高壯竟不知何王陵

一清按魏書地形志燕郡薊有燕昭

王陵燕惠王陵後人遂因此誤以燕刺王且戾陵當之非戾陵在薊西南此陵在薊東南觀道元所叙高

梁河甚明金史世宗本紀大定九年二月詔改葬漢
二燕王于城東蔡珪傳初兩燕王墓舊在中都東城
外海陵廣京城圍基在東城內嘗有盜發其墓大定
九年詔改葬于城外俗傳六國時燕王及太子丹之
葬及啟壙其東墓之柩題其端曰燕靈王舊舊古柩
字通用乃西漢高祖子劉建葬也其西蓋燕康王劉
嘉之葬珪作兩燕王墓辨據葬制名物疑刻甚詳觀
此則知地形志之非道元疑而未定可謂有識者矣

灤水又東南高梁之水注焉水出薊城西北平地泉
流東注逕燕王陵北又東逕薊城北又東南流魏土
地記曰薊東一十里有高梁之水者其水又東南入
灤水也

又東至漁陽雍奴縣西入筍溝

漢光武建武二年封潁川太守寇恂為雍奴侯魏遣

張劭樂進圍雍奴即此城矣筍溝沽水之別名也魏

土地記曰清泉河上承桑乾河東流與潞河合灤水

東入漁陽所在枝分故俗諺曰高粱無上源

一清按高粱水

首受灤水于茂陵堰見下卷鮑邛水篇清泉無下尾蓋以高粱微涓淺

薄裁足津通憑藉涓流方成川則清泉至潞所在枝

分更為微津散漫難尋故也

水經注釋卷十三